

Čitluk, 21.04.2016. godine  
Broj: 319-A/16

**ZAPISNIK I ZAKLJUČCI SA DVANAESTE SJEDNICE  
PREDSJEDNIŠTVA SKUPŠTINE SAVEZA OPĆINA I GRADOVA  
FEDERACIJE BOSNE I HERCEGOVINE**

U Općini Čitluk je dana 21.04.2016. godine održana Dvanaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza su prisustvovali:

1. Emir Bubalo, načelnik Općine Konjic;
2. Nedžad Koldžo, načelnik Općine Novo Sarajevo;
3. Muhamed Ramović, načelnik Općine Goražde;
4. Ivan Vukadin, načelnik Općine Tomislavgrad;
5. Ivo Jerkić, načelnik Općine Čitluk i predsjednik Predsjedništva Saveza;
6. Asim Mekić, načelnik Općine Busovača;
7. Ljubo Grizelj, načelnik Općine Grude.

Pored gore navedenih, sjednici su prisustvovali i: Predrag Šupljeglav, Grad Mostar, Radmila Komadina, Grad Mostar, Vildana Smajović, Općina Novo Sarajevo, predsjednica Komisije za ustavna i zakonodavna pitanja, Vesna Travljanin, direktor Saveza, Zlata Turkić, viši saradnik za rad sa skupštinskim komisijama i institucijama vlasti, Šejla Hasić, viši saradnik za projekte – projekt menadžer, Edin Demirović, saradnik za lokalnu samoupravu, Adi Imamović, saradnik za lokalnu samoupravu i Selma Fišek, viši saradnik za pravna pitanja.

Ivo Jerkić je pozdravio prisutne i otvorio Dvanaestu sjednicu Predsjedništva Saveza. Predložio je Dnevni red kako slijedi:

1. Zapisnik i Zaključci sa Jedanaeste sjednice Predsjedništva Skupštine Saveza općina i gradova Federacije BiH

2. Zapisnik sa sjednice Nadzornog odbora Saveza općina i gradova Federacije BiH:

a) Izvještaj o izvršenju finansijskog plana Saveza općina i gradova Federacije BiH za 2015. godinu

b) Prijedlog finansijskog plana Saveza općina i gradova Federacije BiH za 2016. godinu

Izvjestilac: Admir Hadžiemrić, predsjednik Nadzornog odbora

3. Zapisnik sa zajedničke sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, Komisije za ustavna i zakonodavna pitanja i Komisije za razvoj i unapređenje lokalne samouprave

4. Informacije:

a) Savjetovanje „LOD metodologija i njena primjena“

5. Tekuća pitanja

Predsjedništvo je jednoglasno usvojilo predloženi Dnevni red.

1. Zapisnik i zaključci sa Jedanaeste sjednice Predsjedništva Skupštine Saveza općina i gradova Federacije Bosne i Hercegovine

Predsjedništvo Saveza je jednoglasno usvojilo Zapisnik i zaključke sa Jedanaeste sjednice Predsjedništva Skupštine Saveza općina i gradova Federacije Bosne i Hercegovine.

2. Zapisnik sa sjednice Nadzornog odbora Saveza općina i gradova Federacije BiH:

a) Izvještaj o izvršenju finansijskog plana Saveza općina i gradova Federacije BiH za 2015. godinu

b) Prijedlog finansijskog plana Saveza općina i gradova Federacije BiH za 2016. godinu

Ivo Jerkić je otvorio raspravu o ovoj tački Dnevnog reda.

Admir Hadžiemrić je istakao da je održana sjednica Nadzornog odbora Saveza 07.04.2016. godine na kojoj su članovi Nadzornog odbora konstatovali da Savez

posluje po zakonskim procedurama, te da je došlo do rasta prihoda po osnovu realizacije projektnih aktivnosti. Naglasio je da se stanje uplate članarina malo popravilo, ali da treba ažurirati naplatu za naredni period. Naveo je da se članice Saveza trebaju aktivirati na plaćanju članarine.

Muhamed Ramović je predložio da se članovi Predsjedništva Saveza više aktiviraju po pitanju uplate članarina Savezu.

Admir Hadžiemrić je dodao da je Finansijski plan Saveza općina i gradova Federacije BiH za 2016. godinu korektan i realan, istaknuvši da su određena projektna sredstva izvjesna, ali da još nisu odobrena, tako da je Nadzorni odbor dao sugestiju da se koliko god je to moguće vodi računa o poslovanju Saveza dok ne budu odobrena planirana projektna sredstva. Naveo je da će, ukoliko se to ne desi, biti potrebno raditi rebalans Finansijskog plana Saveza za 2016. godinu. Na kraju je istakao da ne bi bilo problema za funkcionisanje Saveza kada bi članarine bile uplaćivane u punom iznosu.

Predsjedništvo Saveza je jednoglasno usvojilo Zapisnik sa sjednice Nadzornog odbora Saveza općina i gradova Federacije BiH kao i Izvještaj o izvršenju finansijskog plana Saveza općina i gradova Federacije BiH za 2015. godinu i Prijedlog finansijskog plana Saveza općina i gradova Federacije BiH za 2016. godinu.

3. Zapisnik sa zajedničke sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, Komisije za ustavna i zakonodavna pitanja i Komisije za razvoj i unapređenje lokalne samouprave

Vildana Smajović je istakla da je održana zajednička sjednica tri komisije Saveza na kojoj su donešeni određeni zaključci.

Emir Bubalo je naveo da je na sjednici komisija tražio, vezano za Prijedlog zakona o energetske efikasnosti, da kantonalna ministarstva prostornog uređenja plaćaju certifikaciju za individualne i javne objekte.

Predsjedništvo Saveza je jednoglasno usvojilo Zapisnik sa zajedničke sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, Komisije za ustavna i zakonodavna pitanja i Komisije za razvoj i unapređenje lokalne samouprave sa zaključcima kako slijedi:

- Predlaže se Predsjedništvu Saveza općina i gradova Federacije BiH da podrži Prijedlog zakona o energetske efikasnosti, uz uslov da se:
  - Usvoje primjedbe dostavljene Ministarstvu i iznesene na sjednici;
  - Da se obavežu kantonalne/županijske skupštine da usklade zakone o prostornom uređenju sa ovim zakonom;
- Da se traži da kantonalna ministarstva prostornog uređenja plaćaju certifikaciju za individualne i javne objekte;
  - Pri izradi Nacrta zakona o izmjenama i dopunama Zakona o vodama, harmonizirati ovaj zakon sa Zakonom o slatkovodnom ribarstvu, pri tome vodeći računa o Zakonu o principima lokalne samouprave u Federacije BiH;
  - Pri izradi Nacrta zakona o izmjenama i dopunama Zakona o vodama, voditi računa da se, prilikom izdavanja vodnih akata vodi računa da su vode, kao prirodni resurs, u vlasništvu jedinice lokalne samouprave na njenom području;
  - Da se pri izradi Nacrta zakona o izmjenama i dopunama Zakona o vodama konsultira Federalna uprava civilne zaštite u cilju rješenja za prevenciju zaštite vodnih tokova;
  - Nacrt zakona o turizmu Federacije BiH i Nacrt zakona o boravišnoj taksi Federacije BiH predstavljaju dobru osnovu za daljnje aktivnosti;
  - Preispitati ukidanje članarine turističkim zajednicama;
  - Prihvatiti primjedbe iz jedinica lokalne samouprave;
  - U poglavlju Turistički vodiči, riješiti pitanje obavljanja te djelatnosti kao osnovnog i dopunskog zanimanja.
  - Urediti prelazne i završne odredbe zakona;

Predlaže se Predsjedništvu da uputi dopis Federalnom ministarstvu finansija/finansija i Poreznoj upravi Federacije BiH sa molbom da razmotre mogućnost reprogramiranja duga i rješavanja problema blokade računa općina Glamoč i Drvar kao i drugih jedinica lokalne samouprave koje se nalaze ili mogu naći u takvoj ili sličnoj situaciji.

#### 4. Informacije:

##### a) Savjetovanje „LOD metodologija i njena primjena“

Edin Demirović je istakao da je Savez općina i gradova Federacije BiH, u saradnji sa Razvojnim programom Ujedinjenih nacija u BiH (UNDP), 05.04.2016. godine

organizirao savjetovanje o primjeni LOD metodologije za federalna ministarstva, a u svrhu pružanja podrške vertikalnoj integraciji LOD metodologije kao mehanizma za transparentno finansiranje projekata organizacija civilnog društva po standardima Evropske unije. Dodao je da su se učesnici savjetovanja složili da Odluka o usvajanju metodologije za transparentno finansiranje projekata organizacija civilnog društva po standardima Evropske unije, koju je donijela Vlada Federacije Bosne i Hercegovine („Sl. novine FBiH“, br. 23/14), nije dovoljna kako bi sva federalna ministarstva prilikom raspodjele sredstava organizacijama civilnog društva koristila LOD metodologiju, te da je potrebno izraditi akt koji će biti obavezujući za organe uprave na federalnom i kantonalnom nivou u smislu primjene LOD metodologije.

**Predsjedništvo Saveza je primilo k znanju ovu informaciju.**

## 5. Tekuća pitanja

Pod tekućim pitanjima, na zahtjev Federalnog ministarstva finansija/financija, Predsjedništvo Saveza je imenovalo Azru Stambolić pomoćnika načelnika za finansije Općine Ilidža, za predstavnika Saveza općina i gradova Federacije BiH u Arbitražnom tijelu za arbitražu Budžeta Općine Bužim.

Predsjedništvo Saveza je, na zahtjev Ministarstva pravosuđa i uprave Srednjobosanskog kantona, imenovalo Aidu Daul, sekretara Općine Travnik, za predstavnika Saveza općina i gradova Federacije BiH u Komisiji za izradu Zakona o državnoj službi Srednjobosanskog kantona.

Predsjedništvo Saveza je prihvatilo predložene zaključke u vezi Prednacrt zakona o uvođenju posebnih muzejskih zona zaštite, korištenja i obnove kulturne baštine i organizacije saobraćaja na lokalnim cestama na području Kantona Sarajevo koji će biti dostavljeni Ministarstvu kulture i sporta Kantona Sarajevo, a kojima Predsjedništvo Saveza traži da se u toku izrade Nacrta zakona o uvođenju posebnih muzejskih zona zaštite, korištenja i obnove kulturne baštine i organizacije saobraćaja na lokalnim cestama na području Kantona Sarajevo u što

većoj mjeri uvažuje mišljenja jedinica lokalne samouprave Kantona Sarajevo, te da se u Radnu grupu za izradu Nacrta zakona uključi predstavnik Saveza općina i gradova Federacije BiH.

Vesna Travljanin je informisala članove Predsjedništva da je u toku implementacija treće faze Projekta „Podrška savezima općina/opština i gradova“ (AMCS), koji je zajednička inicijativa Saveza općina i gradova Federacije BiH, Saveza opština i gradova Republike Srpske i Misije OSCE-a u Bosni i Hercegovini. Istakla je da Marinka Pranjić (Općina Odžak) koja je jedna od članica Radne grupe ovog Projekta, koju je formirao Savez općina i gradova Federacije BiH, a čiji je cilj unaprjeđenje saradnje Saveza sa općinskim/gradskim vijećima, nije više u mogućnosti prisustvovati sastancima Radne grupe, te da bi bilo potrebno da Predsjedništvo Saveza da saglasnost za proširenje Radne grupe na način da se imenuju dva nova člana umjesto Marinke Pranjić, a zbog velikog broja planiranih aktivnosti u 2016. godini.

Nedžad Koldžo je istakao da vijećima ne treba davati veći značaj nego što ga zaista imaju i naglasio da to potvrđuje i potreba za arbitražom Budžeta Općine Bužim gdje je Federalna ministrica finansija ocijenila da postoji zakonski osnov za pokretanje postupka arbitraže Budžeta Općine Bužim jer je općinsko vijeće uvećalo Prijedlog budžeta za milion KM u odnosu na nacrt i napravilo problem načelniku općine.

Predrag Šupljeglav je pojasnio da se ovaj Projekat bavi unapređenjem saradnje općinskih/gradskih vijeća i saveza.

Vildana Smajović je navela da bi se trebalo zapitati da li je ovaj Projekat dao očekivane rezultate i da li postoji potreba za njegovim nastavkom. Istakla je da je bila član Radne grupe Projekta i da je samoinicijativno napustila istu.

Asim Mekić je predložio da se donese zaključak da općinski načelnici predlažu osobe za Radnu grupu, a ne vijeća.

Zlata Turkić je naglasila da projekat traje do oktobra ove godine.

Nedžad Koldžo je istakao da je ovo ozbiljna stvar i da bi trebalo donijeti zaključak, obzirom da su u toku aktivnosti na izmjeni Izbornog zakona, da su vijećnici dužni položiti državni ispit.

Asim Mekić je istakao da svi imaju pravo birati i biti birani.

Vesna Travljanin je napomenula da projekat traje do oktobra, te da ovdje nisu u pitanju samo vijećnici, nego da je cilj projekta jačanje saveza u zastupanju i lobiranju interesa jedinica lokalne samouprave, a jedan od rezultata koji se želi postići je i jačanje saradnje saveza sa općinskim/gradskim vijećima. Naglasila je da je došlo do formiranja određenih mreža kao što je npr. Mreža općinskih/gradskih koordinatora za rad sa savezima. Dodala je da možemo imati kao temu tačku vezano za projekte koji su od interesa za jedinice lokalne samouprave.

Nedžad Koldžo je naglasio da je ubuduće potrebno da Predsjedništvo Saveza ocijeni da li će se ući u realizaciju projekata prije nego što počne njihova implementacija.

Predrag Šupljeglav je napomenuo da se u sklopu predmetnog Projekta održavaju i regionalni sastanci, te da bi u vezi s tim trebalo obratiti pažnju da potencijalni novi članovi Radne grupe budu iz općina sa područja Kantona 10, Srednjobosanskog kantona i Unsko-sanskog kantona.

**Predsjedništvo Saveza je jednoglasno usvojilo zaključak da se anketiraju jedinice lokalne samouprave sa područja Kantona 10, Srednjobosanskog kantona i Unsko-sanskog kantona s ciljem predlaganja kandidata za članove Radne grupe Projekta „Podrška savezima općina/opština i gradova“ koji se provodi u saradnji sa OSCE-om.**

Vesna Travljanin je informisala članove Predsjedništva da će se konferencija na temu pripadnosti javnih prihoda u Federaciji BiH, koju Savez organizira u saradnji sa Svjetskom bankom, održati 1. juna/lipnja ove godine, te je pozvala članove Predsjedništva da kandidiraju dodatne teme za konferenciju.

Nedžad Koldžo je istakao da bi se prvo trebao izmijeniti Zakon o igrama na sreću.

Ivo Jerkić je postavio pitanje o pokazanom interesu načelnika za Evropsko prvenstvo u nogometu sa gradonačelnike koje će biti održano tokom mjeseca maja/svibnja ove godine u Češkoj.

Selma Fišek je navela da je pokazan mali interes od strane općina za ovo takmičenje, odnosno da su samo tri općine bile zainteresovane.

Vesna Travljanin je naglasila da je dogovoren sastanak članova Predsjedništva Saveza i Federalnog ministra pravde za 27.04.2016. godine, te zamolila da se članovi Predsjedništva putem pismene ankete izjasne da li će moći prisustvovati ovom sastanku.

Nakon konstatacije da su sve tačke Dnevnog reda iscrpljene, Ivo Jerkić je zatvorio Dvanaestu sjednicu Predsjedništva Saveza u 14.00 sati.

Zapisnik sačinila:  
Selma Fišek

Predsjednik Predsjedništva Skupštine Saveza  
Ivo Jerkić, s.r.